



17. Tschanteda da la suprastanza cumünela in marculli, ils 23.9.2015 a las 18.00 in chesa cumünela S-chanf

Presidi: Duri Campell

Preschaints: Gian Andrea Bott, Paolo Bernasconi, Jnes Barblan,

Absaints: Liun Quadri

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 0.212 Decisiun scriver our plazza dal contabel
4. 8.100 Consultaziun plan da svilup dal god
5. 6.200 Uffizi construcziun bassa, dumanda per ütiliser punt in Plaun dals Senchs per svier il trafic düraunt la fabrica in connex cun schlarger la punt da la via chantunela
6. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 16.09.2015 vain approvo unanimamaing.

125 0.211 Dumanda da fabrica Konigsmann Liliana, dumanda per müdamaints dal proget approvo

Liliana Konigsmann ho inoltro üna dumanda per ingrandir la finestra dal murütsch sün parcella nr. 94 in Bügl Suot e cun que üna dumanda per müdamaints dal proget approvo. La suprastanza decida unanimamaing da conceder il müdamaint previs.

126 0.211 Dumanda da fabrica Salzgeber Joos Simon, dumanda per müdamaints dal proget approvo

La suprastanza piglia cugnuschentscha da la dumanda da Joos Simon Salzgeber per ingrandir la halla suot terra sün parcella nr. 810 illa zona da misteraunza Serlas e cun que pel müdamaint dal proget approvo. Zieva cuorta discussiun decida la suprastanza unanimamaing da conceder il müdamaint previs.

127 0.212 Persunel
Decisiun scriver our plazza dal contabel

Causa cha'l contabel actuel ho do aint la desditta sun gnidas analisedas tuot las plazzas ill'administraziun cumünela e'l büro da turissem per fer ün conguel cun l'ultima analisa da l'an 2009. Daspö l'an 2009 s'haun müdedas differentas situaziuns d'infrastructura, da persunel, ma in mincha cas s'ho uzo il schmerdsch da la vschinauncha da S-chanf da 6,9 milliuns francs (cifras rendaint 2008=basa per analisa 2009) sün 10,6 milliuns francs (rendaint 2014=basa per analisa 2015). Tuot in tuot as po dir, cha la dimensiun da la lavur es creschida. Üna collavuraziun cun üna vschinauncha chantunaisa nu vegn tenor sclarimaints in dumanda, siand chi maunchan las resursas correspundentas. Zieva cha la suprastanza ho fat üna lectüra da l'analisa preschainta e zieva animeda discussiun decida quella cun 3 cunter 1 vusch da publicher la plazza libra da 80-100% illa Posta Ladina, illa Südostschweiz ed i'l fögl ufficiel. La cuntraproposta d'eira, da scriver our üna plazza da 60%.

128 8.100 Forestel
Consultaziun plan da svilup dal god

La planisaziun dal svilup dal god es üna basa fich importanta per cultiver e chüerer il god in tuot il chantun Grischun. Ils 20 plans existents vegnan rimplazzos tres 5 plans regiunels. La consultaziun tres las vschinaunchas e'l public dess esser ün factur important in connex cun la revisiun dal plan da svilup dal god (WEP). Il proceder da planisaziun prevezza, cha tuot ils 7 fögls d'objects, nempe il god da protecziun, la producziun da laina, la natüra e la cuntredgia, il god da recreaziun, il god da pasculaziun, il lö chi viva la sulvaschina scu eir l'infrastructura vegnan elavuros particuler e zievatiers. Mincha vouta zieva l'elavuraziun da basa, vain do la pussibilted a las vschinaunchas ed als uffizis chantunels scu eir a la populaziun da piglier pusiziun in merit. Scu prüm sun uoss'avaunt maun ils sbözs dals fögls d'objects god da protecziun e pasculaziun. La suprastanza fo üna lectüra da las actas preschaintas e decida unanimamaing da piglier seguintamaing pusiziun:

God da pasculaziun

Ils lös in Arschaidas ed in Laret, tal zardin, dessan gnir zavros tenor proposta preschainta, però in Laret dess esser pussibel da lascher ir aint la bes-cha düraunt la not a giaschair. Invezza ils gods in val Vaüglia ed in Blais nu paun gnir zavros, siand cha'l pascul stu ster a disposiziun per l'alpageda. La consequenza d'üna decisiun incuntraria füss, cha las 2 alps nu pudessan pü gnir chargedas e nu gnissan cun que pü cultivedas.

God da protecziun

Il god da protecziun da la vart schnestra da Susauna, da la via da Murtèr ingiö, stu rester liber per la pasculaziun da prümavaira e d'utuon. Cun zavrer il god in quel lö gess a perder considerabelmaing pascul chasaun.

129 6.200 Vias e plazzas cumünelas
Uffizi construcziun bassa, dumanda per ütiliser punt in Plaun dals Senchs per svier il trafic düraunt la fabrica in connex cun schlarger la punt da la via chantunela

L'uffizi da construcziun bassa fo la dumanda per ütiliser la punt in Plaun dals Senchs per svier il trafic düraunt la fabrica. Da l'Ospiz Chapella fin tar l'access da la deponia Boschetta Plauna es previs da schlarger la via chantunela. Tal traiget chi vain schlargio tuocho eir tiers la punt dal surpassagi da la Viafier Retica. Per pudair fer las lavuors bsögnaiplas vi da la punt, es important cha'l trafic po gnir svio. La punt chi maina vers il Plaun dals Senchs es gnida surpiglieda da l'an 1975 tres la vschinauncha e lo passan eir las lingias da chanelisaziun ed ova potabla. Impü passa d'inviern la loipa dal sulai e da

sted üna senda ufficiela. Las lavuors da fabrica nu pertuochan la loipa, siand cha quellas vegnan effettuedas düraunt la sted. Zieva animeda discussiun decida la suprastanza unanimamaing da conceder il pmiss, scha la punt vain refatta e garantida chi vain do inavous in bunischem stedi e cha las vascas da la lingia da chanalisaziun per las filielas restan accessiblas scu eir cha la senda publica po gnir nüzzedada sainza prievel.

130 9.999 Varia

Il depüto da scoula orientescha, ch'üna nouva scolara cumanzaro la scoula prosmamaing a S-chanf. Cha quella gnaro integreda illa 5'evla classa.

A las 20.00 vain la tschanteda alveda.

In buna fè

L'actuar:
D. Schwenninger